

LEKSYON 6

ANG BAG-O MO NGA MGA PAGSULONDAN



Ang Matun-an Mo Sa Sini Nga Leksyon

Sin-o ang Nagpasad sang mga Pagsulondan?

**Diin Makita ang mga Pagsulondan?
Paano Mo Matuman ining mga Pagsulondan**

Mga Pagsulondan para sa Kadalag-an

Sin-o ang Nagpasad sang mga Pagsulondan

Ang nagapasad sang mga pagsulondan sa sulod sang balay amo ang mga ginikanan. Ginapahibalo nila sa mga kabataan kon paano sila dapat maggawi. Ginatudloan sang amay ang mga kaba-

taan kon ano ang pagabuhaton nila kag kon ano ang indi.

Sa indi madugay matun-an sang mga kabataan nga magkabuhi sila suno sa mga pagsulondan. Kon maglapas sila, ginasabdong sila sang ila amay. Kon magmalalison sila, pagasilotan sila sang ila amay. Katapo pa gihapon sila sang panimalay, apang ang ila pagkamalinapason nagahatag sang mga problema kag mga pag-antos.

Nagbutang sing mga pagsulondan ang aton Langitnon nga Amay para sa Iya mga kaanakan agud nga mahibaloan nila kon ano ang ila pagabuhaton kag kon ano ang indi. Kon kaisa ginasilotan ang mga anak agud nga matudloan sila nga magmatarung kag magmatinumanon.

Buhata Ini

1. Sin-o ang nagabutang sang mga pagsulondan sa sulod sang panimalay?
.... a) ang mga kabataan.
.... b) ang mga kaiping.
.... k) ang mga ginikanan.
2. Sin-o ang may kinamatarung sa pagsiling kon ano ang aton paggawi subong nga Kristohanon?
.... a) ang aton Langitnon nga Amay.
.... b) ang pagginawi nga aton naandan.
.... k) ang Kristohanon mismo.

Sabat: 1. k) ang mga ginikanan. 2. a) ang aton Langitnon nga Amay.

Diin Makita ang mga Pagsulondan?

Naghatag ang Dios sang talaksan para sa Kristohanon nga pagkabuhi. Makita mo ini tanan sa Biblia, ilabi na gid sa Bag-o nga Katipan.

Para wala na sing pagpangduhaduha kon ano ang kabubot-on sang Dios sa pagginawi sang Iya nga kaanakan, ginapadala Niya ang Iya Anak nga si Ginuong Jesus sa pagtudlo kag sa pagtuytoy sa aton sa husto nga banas. Himpit Sia nga sulondan kag talaksan sa Kristohanon nga pagkabuhi.

Gintudlo ni Ginuong Jesus ang mga pagsulondan sang pagkabuhi nga Kristohanon sa Iya "Wali sa Bukid" nga makita sa Mateo, kapitulo 5, 6 kag 7.

Buhata Ini

3. Sin-o ang naghatag sang himpit nga pagsulondan sang maayo nga pagkabuhi Kristohanon?
 - a) ang pastor.
 - b) si Ginuong Jesu-Kristo.
 - k) ang iban nga mga Kristohanon.
4. Ang "Wali sa Bukid" makita sa kapitulo
 - a) 5, 6, kag 7 sang Mateo.
 - b) 5, 6, kag 7 sang Juan.
 - k) 5, 6, kag 7 sang Markos.
5. Sa "Wali sa Bukid," si Ginuong Jesus
 - a) naghambal sang pagtuo nga makapabalhin sang bukid.

.... b) naghambal nahanungod sang mga bukid sa palibot sang Jerusalem.

.... k) nagtudlo sang mga pagsulondan sa pagkabuhi nga Kristohanon.

Sabat: 3. b) si Ginuong Jesu-Kristo. 4. a) 5, 6, kag 7 sang Mateo. 5. k) nagtudlo sang mga pagsulondan sa pagkabuhi nga Kristohanon.

Una sa tanan, naghambal si Ginuong Jesus nahanungod sang pinasahi nga pagpakamaayo nga ginahatag sang Dios sa mga mapinauboson, mahidaiton, kag putli sang tagipusoon – sila nga ginauna ang Dios sa ila kabuhi kag handa sa pag-antos bangod lamang sa Iya.

Nagtudlo si Ginuong Jesus sa paghigugma sang aton mga kaaway kag sa pagpangamuyo sa ila, magpangayo sing patawad sa ila nga aton napasandad, kag maghimo sing maayo sa ila nga nagapakamalaut sa aton. Ang mga gintudlo Niya nahanungod sa maayo nga pagpakig-upod sa iban amo ang labing maayo nga pagtudlo nga wala pa gid mahatag ni bisan sin-o man.

Buhata Ini

6. Basaha ang Mateo kapitulo 5.

7. (Magpili sang duha ka husto nga sabat.)

Subong nga bahin sang mga pagsulondan sa kabuhi, ginatudlo ni Ginuong Jesus sa

imo

- a) ang pagkamapainuboson.
- b) ang pagsunod sa Dios una sa tanan kag sa pagtuman sang buot Niya nga pagahimuon mo.
- k) ang pagtimalus sa mga nagapigos sa imo.
- d) ang paglipay sang imo kaugalingon.

8. (Magpili sang duha ka husto nga sabat.)
Sa Mateo 5:13, 14 nagtudlo si Ginuong Jesus nga ang mga anak sang Dios

- a) kaangay sang asin para sa bug-os nga kalibutan.
- b) wala sing kapaltahan.
- k) kaangay sang suga nga nagasiga sa bilog nga kalibutan.
- d) kaangay sang matahom nga bulak.

9. (Magpili sang duha ka husto nga sabat.)
Sa Mateo 5:21-30 nagpaandam si Ginuong Jesus batok sa

- a) pagsugal.
- b) kaakig kag pagtimalus.
- k) mahigko nga mga panghunahuna kag pagpakighilawas.
- d) pagbayad sang ikapulo.

10. Sa Mateo 5:43-48, nagsugo si Kristo Jesus

- a) sa paghigugma lamang sa naghigugma sa aton.
- b) sa paghigugma sang aton mga kaaway.

Sabat: 7. a) ang pagkamapainuboson. b) ang pagsunod sa Dios una sa tanan kag sa pagtuman sang buot Niya nga pagahimuon mo. 8. a) kaangay sang asin para sa bug-os nga kalibutan. k) kaangay sang suga nga nagsiga sa bilog nga kalibutan. 9. b) kaakig kag pagtimalus. k) mahigko nga mga panghuna-huna kag pagpakighilawas. 10. b) sa paghigugma sang aton mga kaaway.

Naghatag si Ginuong Jesus sang palasandigan nga prinsipyo kon paano ang magpakig-upod sa iban nga tawo. Ginatawag ini nga Bulawanon nga Tulomanon:

“Busa ang tanan nga butang nga buot ninyo nga himuon sang tawo sa inyo, himoa man sa ila.” Mateo 7:12.

Indi kita magbugalon, magdinalok, magpalaaway, ukon magpangyubit. Indi man maayo nga hatagan naton sing duog sa aton ulo ang binastos nga mga paghunahuna.

Ang handumon naton una sa tanan amo ang pagpahamuot sa Dios kag sa pagbuhat sang gusto Niya nga aton buhaton. Indi mahimo nga maghamkon kita sang dutan-on nga manggad bilang aton lalambuton kag mag-alagad sa Dios sa amo man nga tion. Kay kon aton Sia unahon, pat-od nga ihatag Niya sa aton ang aton mga kinahanglanon. Wala labot sina, kon ano ang ginahimo naton para sa Iya, pagapadyaan Niya kita sang manggad nga wala sing pagkaubos didto sa langit.

Buhata Ini

11. Basaha ang Mateo kapitulo 6.
12. Ang Bulawanon nga Tulomanon amo nga
 a) gamiton naton ang bulawan sa mga butang nga mapuslanon.
 b) kon ano ang ginahimo sang iban sa aton amon man ang himuon naton sa ila.
 k) pagahimuon naton sa ila ang buot naton nga pagahimuon nila sa aton.
13. Sa Mateo 6:19-21 nagsiling si Ginuong Jesus nga magatago kita sing bahandi sa
 a) langit
 b) duta.
- Sabat: 12. k) pagahimuon naton sa ila ang buot naton nga pagahimuon nila sa aton.
 13. a) langit.

Paano Mo Matuman ining mga Pagsulondan?

Nahibaloan ni Ginuong Jesus nga wala gid sing isa nga makatuman sining mga pagsulondan kon indi sia pagbuligan sang Dios. Gani gintudloan Niya ang Iya mga gintuton-an sa pagpangamuyo sa Langitnon nga Amay kag magpangayo sa Langitnon nga Amay kag magpangayo nga buligan sila. Naghatag Sia sing sulondan sang pagpangamuyo sa Mateo 6:9-13, kag ginatawag naton ini nga Pangamuyo sang Ginuo. Masami naton nga ginasulit ini kon magpangamuyo kita.

Ilabi sa tanan, nagpadala ang imo Amay sang Balaan nga Espiritu sa pagpuyo sa imo kag sa

pagbulig sa imo. Madamo pa gid ang imo matunan nahanungod sini sa masunod nga kapitulo. Indi ka dapat magkabalaka kon indi pa gid ikaw makasarang sa pagsunod sang ginapaabot sang Dios sa imo. Buligan Niya ikaw sa tanan mo nga pagpanglakatan sa sining kabuhi.

Buhata Ini

14. Naghatag si Kristo sang sulondan sa pangamuyo sa sining wali nga nagatudlo sa aton sa

.... a) pagpangadi sa santos.

.... b) pagpangadi sa aton mga katigulangan.

.... k) pagpangamuyo nga direkta sa Dios.

15. Ang pangamuyo sang Ginuo amo-

.... a) ang pangamuyo Niya sa krus.

.... b) ang sulondan sa pangamuyo nga makita sa "Wali sa Bukid."

.... k) ang pangamuyo ni Kristo sa hardin sang Getsemane.

16. Basaha ang Mateo 7.

Sabat: 14. k) pagpangamuyo direkta sa Dios.

15. b) ang sulondan sa pangamuyo nga makita sa "Wali sa Bukid."

Mga Pagsulondan para sa Kadalag-an

Ginpaalinton ni Ginuong Jesus sa aton nga ang Iya kasugoan amo ang gabayan sa madinalagon nga pagkabuhi. Ang aton kabuhi kaangay sang balay. Ang aton panghunahuna, pulong kag buhat, amo ang mga materyales sang balay. Kon

magpasad kita sa sadsaran sang Iya pagtulon-an, makaangkon kita sang kabuhi nga makatindog batok sa mga pagtilaw kag unos sang kabuhi. Ang nagakabuhi suno sa iya lang naluyagan kag wala nagasunod sa mga sulondan nga ginhatag ni Ginuong Jesus, indi magmadinalag-on. Kaangay sia sang balay nga napasad sa balas nga wala sing sadsaran. Indi sia makapakigsumpong sa unos.

Kon buot mo nga magmangin madinalag-on nga Kristohanon, ipasad ang imo kabuhi sa pagtulon-an ni Ginuong Jesus kag magsunod sa Iya mga pagsulondan. Pagabuligan ikaw sang Balaan nga Espiritu.

Buhata Ini

17. Ang nagatuman sa pagtulon-an ni Ginuong Jesus kag nagagamit sini subong nga sadsaran sang Kristohanon niya nga pagkabuhi kaangay sang

.... a) tawo nga nagpasad sang iya balay sa bato.

.... b) tawo nga nagpasad sang iya balay sa balas.

18. Karon sulati ang imo "Rekord sang Bumolutho" para sa Leksyon 6.

Sabat: 17. a) tawo nga nagpasad sang iya balay sa bato.

TION PARA SA PALASINAWAN

Karon imo na masulat ang mga sabat sa imo palasinawan.

PAGPAKILALA sang LEKSYON 7

Kon ikaw nagasugod sa pagbatyag nga indi lang tuman ang paghibalo sang mga pagsulondan sang Dios para sa kabuhi nga Kristohanon, kag nagakinahanglan ikaw sang dugang nga gahum kag kusog sa pagkabuhi sining “bag-o nga kabuhi”, handa na ikaw sa pagtuon sang Leksyon 7. Kon ang Kristohanon nga pagkabuhi isa ka mabudlay nga paghimud-os kag nagaatubang ikaw sang isa nga makabulig sa imo, ang Leksyon 7 mahimo nga amo ang imo ginapangita.

Ang ICI nakahibalo nga magakinahanglan ikaw sang pinasahi nga pagpabakod kag bulig agud makakita ikaw sang kusog sa pagkabuhi suno sa mga pagsulondan sang Dios nga madinalag-on kag amo ini ang kabangdanan kon ngaa ang Leksyon 7 ginhanda. Si Jesus nagpadala sang Balaan nga Espiritu sa kalibutan sa pagbulig sa tumoluo! Si Jesus nakahibalo nga ang paghimud-os sa pagkabuhi sang Kristohanon nga kabuhi nga wala ang Balaan nga Espiritu mangin isa ka imposible sa tawo. Ang madason nga leksyon nga ginatig-ulohan, “MAY KABULIG IKAW,” magapaat-hag kon paano ang Balaan nga Espiritu makapanghikot sa imo kabuhi kag makapakabuhi sa imo sang isa ka madinalag-on nga kabuhi nga Kristohanon. Nakapat-od kami nga ang Leksyon 7 makabulig gid sa imo.

Palihog kompletaha ang palasinawan para sa Leksyon 6 kag kaupod sang imo bulig, ipadala ini sa ICI. Ang Leksyon 7 kag 8 igapadala sa imo. Dumdoma, nga ang ICI amo ang imo bulothon sa espirituhanon nga kabuhi kag subong kalapit sa imo katulad sang inyo “post office”. Ang bulig makalambot sa imo paagi sa balos nga koreo. Magsulat karon sa International Correspondence Institute, Philippine National Office, P. O. Box 1084, Manila.